

四庫全書

集部

欽定四庫全書

集部

古今禪藻集卷

五至七

詳校官庶吉士_臣謝恭銘

主事銜_臣徐以坤覆勘

總校官庶吉士_臣倉聖脉

校對官中書_臣葉 葵

謄錄監生_臣任 鑑

欽定四庫全書

古今禪藻集卷五

明釋正勉釋性通同輯

唐

七言律詩

題黃公陶翰別業

處一

聞說花源可避秦
幽尋數月不逢人
煙霞洞裏無雞犬
風雨林間有鬼神
黃公石上三芝秀
陶令門前五柳春
醉卧白雲閒入夢
不知何物是吾身

贈司空拾遺

太易

侍臣何事辭雲陛江上微吟見雪花望闕未承丹鳳詔

一作未容
窺日月

閉門空對楚人家

一作空自
傲煙霞

陳琳草奏才還

在王粲登樓興尚賒高館更容塵外客仍令歸路奉瑤華

別盛安

護國 三首

情人取次幾淹留別後南州與北州月色為憐今夜客
砧聲却似去年秋欲除豺虎論三畧莫對雲山詠四愁

親故相逢且休問古來無種是王侯

逢靈道士

浮丘山上見黃冠松栢森森登古壇一莖青竹以為杖
數顆仙桃仍未餐長安市裏恒賣卜武陵溪畔每燒丹
縮地往來無定所花源到去路漫漫

傷蔡處士

篋中遺草是琅玕對此空令灑淚看三徑尚餘行跡在
數螢猶是映書殘晨光不借泉門曉暝色惟添隴樹寒

欲問皇天天更遠有才無命說應難

題東蘭若

靈一 五首

上人禪室路徘徊萬木清陰向日開
寒竹影侵行道石
天花香散誦經臺閒雲不繫從舒卷
狎鳥無機任往來
更惜片陽談妙理歸時莫待暝鐘催

送明素上人歸楚覲省

能將踈懶背時人不厭孤萍任此身
江上昔年同出處
天涯今日共風塵平湖舊隱應殘雪
芳草歸心未隔春

前路倍憐多勝事到家知慶綵衣新

江行寄張舍人

客程終日風塵苦蓬轉還家未有期
林色曉分殘雪後角聲寒奏落帆時
月高星使東看遠雲破霜鴻北度遲
流蕩此心難共說千峯澄霽隔瓊枝

送王頴悟佐歸州

集作歸左縣

客意天南興已闌不堪言別向仙官夢
搖玉佩隨旄節心到金華憶杏壇
荒郊極望歸雲盡瘦馬長嘶落日殘

想得故山青
靄裏泉聲入夜獨潺潺

哭衛尚書

畫戟重門楚水陰
天涯欲暮共傷心
南荆雙履痕猶在
北斗孤魂望已深
蓮花幕下悲風起
細柳營邊曉月臨
前路茫茫向誰問
感恩空有淚沾襟

春日旅懷呈知己

惟審

生涯萬事有蒼蒼
應任浮萍便越鄉
春水獨行人漸遠
故園歸路夜空長
一聲隔浦猿啼處
數滴驚心淚滿裳

不為知音皆鮑叔信誰江上去茫茫

垓下懷古

棲一 二首

緬想咸陽事可嗟楚歌哀怨思無涯
八千子弟歸何處萬里鴻溝屬漢家
弓指陣前爭日月血流垓下定龍蛇
拔山力盡烏江水今古悠悠空浪花

武昌懷古

戰國城池盡悄然昔人遺跡徧山川
笙歌罷吹幾多日臺榭荒涼七百年
蟬響夕陽風滿樹鴈橫秋島雨漫天

堪嗟世事如流水空見蘆花一釣船

張舍人南溪別業

法振 二首

新田繞屋半春耕藜杖開門引客行
山翠自成微雨色溪花不隱亂泉聲
漁家遣到堪留興公府懸知欲厭名
入夜更宜明月滿雙童喚出解吹笙

丹陽浦送客之海

不到終南向幾秋移居更欲近滄洲
風吹雨色連村暗潮擁菱花出岸浮
漠漠望中春自豔寥寥泊處夜堪愁

如君豈得空高枕只益天書遣遠求

送韓侍御自使幕巡海北

微雨過山夜洗兵繡衣朝拂海風清
幕中運策心應苦馬上題詩卷已成
離筵莫惜花源醉古道猶看蔓草生
因說元戎能破敵高歌一曲隴關情

送皇甫侍御曾還丹陽別業

皎然 六首

雲陽夜別憶春畊花發菱湖問去程
積水悠揚何處夢亂山稠疊此時情
將離有月教絃斷贈送無蘭覺意輕

朝右要君持漢典明年北墅可須營

題周諫別業

有寺與周生所
居俱臨茗水

隱身苔上欲如何不着青袍愛綠蘿
柳巷任疎容馬入水籬從破許船過
昂藏獨鶴閑心遠寂歷秋花野意多
若訪禪齋還可見竹窓書幌共煙波

白蘋洲送洛陽李丞使還

蘋洲北望楚山重千里迴輶止一封
臨水情來還共載看花醉去更相從
罷官風渚何時別寄隱雲陽幾處逢

後會那應似疇昔年年覺老雪山容

春日杼山寄贈李員外

南山唯與北山隣一閉禪關老此身黃鶴有心多不住
白雲何事獨相親閒持竹錫行看水懶繫麻衣出見人
無限幽芳徒欲寄郎官那賞石門春

山居示靈徹上人

清明路出山初暖行踏春蕪看茗歸乍削柳枝聊代札
時窺雲影學栽衣身閒始覺隳名是心了方知苦行非

物外寂中誰似我松聲草色共忘機

晚春尋桃源觀

武陵何處訪仙鄉古觀雲根路已荒
細草擁壇人跡絕落花沈澗水流香
山深有雨寒猶在松老無風韻亦長
全覺此身離俗境玄機亦可照迷方

喜嚴侍御蜀還贈嚴祕書

清江四首

往年分首出咸秦木落花開秋又春
江客不曾知蜀路旅魂何處訪情人
當時望月思文友今日迎驄見近臣

多羨二龍同漢代繡衣芸閣共榮親

贈淮西賈兵馬使

破敵功成百戰場天書新拜漢中郎
映門旌旆春風起對客絃歌白日長
階下鬪雞花乍發營南試馬柳初黃
由來吳楚多同調感激逢君共異鄉

登樓望月寄鳳翔李少尹

陌上涼風槐葉凋夕陽清露濕寒條
登樓望月楚山上月到樓南山獨遙
心送秦人超鳳閣目隨陽鴈極煙霄

軒車不重無名客此地誰能訪寂寥

送車叅軍江陵

一作韋叅軍

槐花落盡柳陰清蕭索涼天楚客情海上舊山無的信
東門歸路不堪行身隨幻境勞多事跡學禪心厭有名
公子道存知不棄欲依劉表住南荆

冬送鑒供奉歸蜀寧親

靈徹

林間出定戀庭闈聖主恩深暫許歸雙樹欲辭金錫冷
四花猶向玉堦飛梁山拂漢分清境蜀雪和煙變翠微

此去不須求綵服紫衣全勝老萊衣

聖恩顧問獨遊月鐙閣直書應制

廣宣

五首

禪居河畔無多地來往尋春物正華
磴道上盤千畝竹
闌干低數萬人家
簷前施食來飛鳥
林下行香踏落花
自解剎那知佛性
不勞更喻幾塵沙

駕幸普濟寺應制

南方寶界幾由旬
八部同瞻一佛身
寺壓山河天宇靜
樓懸日月鏡光新
重城柳暗東風暖
複道花明上苑春

向晚鑾輿歸鳳闕曲江池上動青蘋

安國寺隨駕幸興唐觀應制

東隣

一作林

何獻是西隣禪客垣牆接羽人萬乘遊仙宗

有道三車引路本無塵初傳寶訣長生術已證金剛不
壞身兩地同修天上事共瞻鸞鶴重來巡

紅樓院應制

紅樓疑見白毫光寺逼宸居福盛唐支遁愛山情漫切
曇摩泛海路空長經聲夜息聞天語爐氣晨飄接御香

誰謂此中難可到自憐深院得徊翔

再入道場紀事應制

南方歸去再生天內殿今年異昔年見闕乾坤新定位
看題日月更高懸行隨香輦登仙路坐近爐煙講法筵
自喜恩深陪侍從兩朝長在聖人前

送禪友

無本

纔年七歲便從師猶說辭家學佛遲新斲松蘿還不住
愛尋雲水擬何之孤谿雪滿維舟夜疊嶂猿啼過寺時

鳥道龍湫悉行後豈將翻譯負心期

題崔駙馬林

無可

宮花野藥半相和藤蔓參差惜不科
纖草連門留徑細
高樓出樹見山多
洞中避暑青苔滿
池上吟詩白鳥過
更買太湖千片石
疊成雲頂綠嵯峨

晚秋江館寄姚郎中

清塞七首

病起西州居帶城
傍門高柳一蟬鳴
激波月上見魚擲
荒徑葉乾聞犬行
越島夜無侵閣色
寺鐘涼有隔原聲

故園賣盡休歸去湖水秋來空自平

寄韓司兵

多病十年無舊識滄州亂後始逢君
已知罷秩辭瀧水相勸移家住嶽雲
泗上旅帆侵疊浪雪中歸路踏荒墳
更為此別愁應老書劄何由到北軍

贈姚合郎中

望重來為守土臣清高還似武功貧
道從會解惟求靜詩造玄微不趁新
玉帛已知難挽思雲泉終是得閒身

兩衙向後長無事門館多逢請益人

秋日同朱慶餘懷少室舊隱

曾居少室黃河畔秋夢長縣未得回扶病十年離水石
思歸一夜隔風雷荒齋幾度僧眠起晚菊頻經鹿踐來
燈下此心誰共說傍松幽徑已多苔

贈厲玄侍御

山松逕與瀑泉通巾舄行吟想越中塞鴈去經華頂末
鄉僧來自海濤東關分河漢秋鐘絕露滴獼猴夜嶽空

抱疾因尋周柱史杜陵寒葉落無窮

上陝府姚中丞

此心長愛狎禽魚仍候登封獨著書
領郡只嫌生藥少在官長恨與山疎
成家盡是經綸後得句應多諫諍餘
見說養真求退靜溪南泉石許同居

送韓評事

門枕平湖秋景好水煙松色遠相依
罷官餘俸租田種送客回舟載石歸
離岸游魚逢浪返望巢寒鳥逆風飛

嵩陽舊隱多時別，閉目閒吟憶翠微。

刺史白樂天以詩見招賦此答之 韜光

山僧性喜好林泉，每向巖阿枕石眠。
不解栽松陪玉勒，惟能引水種金蓮。
白雲乍可來青嶂，明月難教下碧天。
城市不堪飛錫到，恐妨鶯囀畫樓前。

送新平故人

懷楚

常聽鷓鴣思舊友，又因蝴蝶夢生涯。
一千餘里河連郭，三十六峯寒到家。
陰島宜分東鴈晴樓高，上上陽鵝

姜嫄廟北與君別應笑薄寒悲落花

柳

慕幽
三首

今古憑君一贈行幾回折盡復重生
五株斜傍淵明宅
千樹低垂亞父營
臨水帶煙藏翡翠
倚風兼雨宿流鶯
隋煬堤畔依依在
曾惹當時歌吹聲

燈

鐘斷危樓鳥不飛
熒熒何處最相宜
香然水寺僧開卷
筆寫春闈客著詩
忽爾思多穿壁處
偶然心盡斷纓時

孫康勤苦誰留念少減餘光借與伊

三峽聞猿

誰向茲來不恨生聲聲都是斷腸聲七千里外一家住
十二峯前獨自行瘴雨晚藏神女廟蠻煙寒鎖夜郎城
憑君且聽哀吟好會待青雲道路平

經廢宮

棲白三首

終日河聲咽暮空煙愁此地晝濛濛錦帆東去沙侵苑
玉輦西來樹滿宮魯客望津天欲雪朔鴻離岸葦生風

那堪獨立思前事回首殘陽雉堞紅

贈識古法師

重城深寺講初休却憶山家訪舊遊對月與君相送夜
聞蛩教我獨驚秋雲心杳杳難為別鶴性蕭蕭不可留
遙想孤舟清渭上飄然帆影起離愁

壽昌節賦得紅雲表夏日

景候融融陰氣潛如峯雲共火相兼霞光捧日登天上
丹彩乘風入殿簷行逐赤龍千歲出明當朱夏萬方瞻

微臣多幸逢佳節得賦殊祥近御簾

題茅山李尊師所居

貫休 七首

天師百歲少如童不到山中更不逢
洗藥每臨新瀑水步虛時繞最高峯
籬根五月留殘雪座右千年蔭古松
此去人寰知近遠迴看路隔一重重

獻錢尚父

貴逼人來不自由龍驤鳳翥勢難收
滿空

一作堂

花醉三

千客一劍霜寒十四州鼓角揭天嘉氣冷
風濤動地海

山秋東南永作金天柱誰羨當時萬戶侯

休公以詩謁武肅王王遣客謂曰請和尚改十
四州為四十州當重遇師師曰州亦難添詩亦
難改聞雲孤鶴何天
不可飛耶飄然入蜀

繡州張相公見訪

德符唐德瑞通天曾叱讒諛玉座前千襲綵衣宮錦薄
數床御札主恩偏出師暫放蕭何筋得罪惟撐范蠡船
未報君恩終必報不妨金地禮青蓮

山居四首

誰是言休即便休
高吟靜坐碧峯頭
三間茅屋無人到
十里松門獨自遊
明月清風宗炳社
夕陽秋色庾公樓
修心未到無心地
萬種千般逐水流

露滴紅蘭玉繞畦
閑拖象屐到峯西
但令心似蓮花潔
何必身將槁木齊
古塹細煙紅樹老
半巖殘雪白猿啼
雖然不是桃源洞
春至桃花亦滿蹊

心心心不住希夷
石室巉巖白髮垂
惜竹不除當路筍
愛松留得礙人枝
焚香開卷雲生砌
捲箔冥心月在池

無限故人頭盡白不知頭白又何之

自古浮華能幾幾逝波終日去滔滔漢王廢苑生秋草
吳主荒宮入夜濤滿屋黃金機不息一頭白髮氣猶高
豈知物外金仙子甘露天香滴毳袍

憶廬山舊居

處默 二首

麤衣糲食老煙霞勉把衰顏惜歲華獨鶴祇為山客伴
閒雲常在竺僧家叢生嫩蕨粘松粉自落乾薪帶蘚花
明月清風舊相得十年歸恨可能賒

棲霞寺僧房

名山不取買山錢
任構花宮近碧巔
松檜老依雲裏寺
樓臺深鎖洞中天
風經險嶂回疎雨
石倚危屏挂落泉
欲結茅庵伴師住
宵饒多少薜蘿煙

送泰禪師歸南嶽

齊己
七首

石龕閒鎖白猿邊
歸去途程半在船
林簇曉霜離水寺
路穿新燒入山泉
已尋嵐壁臨空盡
却看星辰向地懸
有興寄題紅葉上
不妨收拾別為編

荊州貫休大師舊房

疎篁抽筍柳垂陰舊是休公種此吟入貢文儒來請益
出官卿相駐過尋右軍書畫神傳髓康樂文章夢授心
消得青城千嶂下白蓮標塔帝恩深

早鶯

何處經年絕好音暖風催出轉喬林羽毛新刷陶潛菊
喉舌初調叔夜琴怕雨並棲紅杏密避人雙入綠楊深
曉來枝上千般語應共桃花說舊心

寄萍鄉唐稟正字

新書聲價滿皇都，高卧林中更起無。
春興酒香薰肺腑，夜吟雲氣濕髭鬚。
同登水閣僧皆別，共上漁船鶴亦孤。
長憶前年送行處，洞門殘日照菖蒲。

送李秀才歸湘中

詞客攜文訪病夫，因吟送別憶湘湖。
寒消浦溆催鴻鴈，暖入溪山養鷓鴣。
僧向月中尋嶽麓，雲從城上去蒼梧。
君歸為問峯前寺，舊住松房鎖在無。

聞尚顏上人初居有寄

麓山南面橘州西，別構新齋與竹齊。
野客已聞將鶴贈，江僧未說有詩題。
窓臨杳靄雲千嶂，枕徧潺湲月一溪。
可想乍移吟榻處，松陰冷濕壁新泥。

送人入蜀

何必閒吟蜀道難，知君心出險巇間。
尋常秋泛江陵去，容易春浮錦水還。
兩面壁懸神女峽，幾重青出丈人山。
文君酒市逢初雪，滿貫新沽洗旅顏。

懷齊已上人

曇域

鬢髯秋景兩蒼蒼
靜對芳齋一炷香
病後身心俱寂寞
老來親友半凋傷
峨眉山色侵雲直
巫峽灘聲入夢長
猶喜深交有支遁
時時音信到松房

寄荆門鄭準

尚顏
四首

傳衣傳鉢理難論
綺靡銷磨二雅尊
不許姓名留月觀
終攜瓶錫去雲門
窓間挂燭通宵在
竹上題詩隔歲存
珍重荊州鄭從事
十年同受景升恩

懷智樓上人

臨水登山自有期不同遊子暮何之閒眠默坐身堪賞
已去還來事可知林鳥隔雲飛一餉草蟲和雨叫多時
思君最易令人老倚檻空吟所寄詩

自紀

諸機忘盡未忘詩似向詩中有所依遠境等閒支枕覓
空山容易杖藜歸清猿一一居林叫白鳥雙雙避釣飛
欲畫淨名居士像焚香願見陸探微

峽中酬荆南鄭準

山齋西向蜀江濱
四載安居復有羣
風鴈勢高猶可見
雪猿聲苦不堪聞
新詩寫出難勝寶
破衲披行却類雲
每喜泝流賓客說
元瑜刀筆潤雄軍

題楚廟

歸仁 三首

羞容難更返江東
誰問從來百戰功
天地有心歸道德
山河無力為英雄
蘆花尚認霜戈白
海日猶思火戰紅
也是男兒成敗事
不須惆悵對西風

牡丹

三春堪惜牡丹奇，半倚朱欄欲綻時。
天下更無花勝此，人間偏得貴相宜。
偷香黑蟻斜穿葉，覩蝶黃鶯倒挂枝。
除却解禪心不動，算應狂殺五陵兒。

悼羅隱

一著讒書未快心，幾抽胸臆縱狂吟。
管中窺豹我猶在，海上釣鰲君已沈。
歲月盡能銷憤懣，寰區那更有知音。
長安冠蓋皆塗地，仍喜先生葬碧岑。

懷廬山舊隱

若虛

九疊嵯峨倚碧天，每隨寒瀑下巖煙。
深秋猿鳥來心上，靜夜松杉到眼前。
書架想遭苔蘚裹，石窓應被薜蘿纏。
一枝筇杖遊江北，不見廬峰二十年。

古今禪藻集卷五

欽定四庫全書

古今禪藻集卷六

明釋正勉釋性通同輯

唐
五言排律

觀大駕出叙事寄懷

法振
二首

紫臺宵漏竭青門曙鼓通
輕霞照複道徐吹轉相風
玉鑿光萬騎金輿鬱五戎
鳴笳猶度闕清蹕尚喧宮
雲旗亂陌紫羽旆雜塵紅
百城歸壯麗兩漢久慙雄
吾曹陋

薄技餘慶洽微躬平原已起洛印手亦還豐得奉衣冠
盛仍觀書軌同猶言待封告未忍向華嵩

送褚先生海上尋封鍊師

潮落風初定天吳避客舟近承三殿旨欲向五湖遊不
厭烏皮几新縫鶴氅裘明珠漂斷岸陰火映中流華蓋
芝童引神丹桂女收懸知居縹緲固為識浮丘

奉陪顏使君修韻海畢東溪泛舟餞諸文士

皎然
十三首

諸侯崇魯學羔鴈日成羣外史刊新韻中郎定古文

魯公

著書依初韵起東
字字脚皆例古篆

菁華兼百氏雅素備三墳國語思開

物王言欲致君研精業已就歡宴惜應分獨望西山去
將身寄白雲

冬日遥和盧使君幼平綦母居士遊法華寺高頂
臨湖亭

仁芳標絕境廉守躡高蹤天見纔分剎風傳欲盡鐘城
中歸路遠湖上碧山重水照千花界雲開七葉峯寒空

黃綬滿晴翠白綸濃逸韻知難繼佳遊恨不逢仍聞撫
禪石為我久從容

陪顏使君餞宣諭蕭常侍

江淮凋瘵後遠使發天都昏墊宸心及哀矜詔命敷恤
民驅急傳訪舊枉飛艫外鎮藩條最中朝顧問殊文皆
正風俗名共溢寰區已事方懷闕歸期早戒途繁笳咽
水閣高蓋擁雲衢暮色生千嶂秋聲入五湖離歌猶宛
轉歸馭已踟躕今夕庾公意西樓月亦孤

春日酬祭獄瀆使大理盧卿自會稽迴經年將赴
朝寄故林十二韻

望祀崇周典，皇華出漢庭。
紫泥頒會計，玄酒薦芳馨。
聖慮祈多祐，齋心合至靈。
占祥形史竹，筮日數堯羹。
禮秩新加命，朝章舊理刑。
敷誠依北闕，遺愛在西亭。
五袴歌仍詠，三碑石重銘。
躊躇問存沒，委曲向郊垌。
苔水曾同泛，稽山昔共經。
清風門客仰，佳頌國人聽。
奉使朝行月，飛文夜動星。
征途回四牡，還戀故林青。

晨起登樂遊原望終南積雪

凌晨擁敝裘閑上古原頭
雪霽山疑近天高思若浮
瓊峯埋積翠玉嶂掩飛流
曜彩含朝日搖光奪寸眸
寒空標瑞色爽氣襲皇州
清眺何人得終當獨再遊

同薛員外喜雨詩兼上楊使君

積旱思飛洒蒸民喜亦傾
郊雲不待族雨色飛江城
焦稼濯又發敗荷滋更榮
時隨霧縠重集作柳絲輕
一宿恐魚躍數朝徵鶴集作
鳴毒暑澄為冷高塵滌還清
乃

知陰陽數制在理化情及此接歡賀臨風聞頌聲

馬兵曹李良宅夜集

清景不可失尋君趣有餘
身高避事外道長問心初
出處名則異遊從跡可疎
吟看刻畫燭笑卷讀殘書
露彩生筆硯風音入庭除
平明仙侶散觥觥動迴車

酬薛員外誼見戲

方知正始作麗掩碧雲詩
文彩盈懷袖風規發詠思
遺弓逢大敵摩壘怯偏師
頻有遺書讓多慙繼組遲
淺才

迂且拙虛譽喜還疑猶倚披沙鑒長歌向子期

奉送李中丞道昌入朝

文憲中司盛恩榮外鎮崇諸侯皆取則八使獨推功詔
喜新銜鳳車看舊飾熊去思今武子餘教昔文翁清白
如江水仁流是國風先徵二千石掃第望司空

冬日送顏延之明府撫州覲省

臨川千里別惆悵上津橋日暮人歸盡山空雪未消鄉
雲心渺渺楚水路迢迢林下方懽會山中獨寂寥天寒

驚斷鴈江信望回潮歲晚流芳歇思君在紫霄

秋日遇和盧使君遊柯山寺宿啟上人上方論涅槃經大義

江郡當秋景期將道者同跡高憐竹寺夜靜賞蓮宮古
磬清霜下寒山曉月中詩情緣境發法性寄筌空翻譯
推南本何人繼謝公

奉送陸中丞長源詔徵入朝

詔下鄴侯幕徵賢寵大勲才當持漢典道可致堯君藩

牧今榮餞詩流此盛文水從吳渚別樹向楚門分宿寺
期佳月看山識故雲歸心復何託惆悵在江濱

同盧使君幼平郊外送閭侍御歸臺

留餞飛旌駐離亭草色閒栢臺今上客竹使舊朝班日
落東西水天寒遠近山古江分楚望殘柳入隋關戀闕
心常積迴軒日不閒芳辰倚門道猶得及春還

早發陝州途中贈嚴祕書

清江 三首

此身雖不繫憂道亦勞生萬里江湖夢千山雨雪行人

家依舊壘闕路閉層城未滅交河寇猶屯細柳兵艱難
嗟遠道棲託賴深情貧病吾將有精修許少卿

早春書情寄河南崔少府

日日東風至陽和似不均病身空益老愁鬢不知春宇
宙成遺物光陰促幻身客遊傷末路心事向行人道薄
猶懷土時難欲厭貧微才如可寄赤縣有鄉親

早遊司直城西鷓鴣谿別業

別墅軍城下閒喧未可齊春深花蝶夢曉隔柳煙鞦韆

景浮寒水疎楊映綠堤沿洄看竹色來往聽鶯啼久慢
持生術多親種藥畦家貧知素行心苦見清溪越客初
投分南枝得寄棲禪機空寂寞雅趣賴招攜本寺重江
外遊方二室西徘徊戀知己日夕草萋萋

禁中法會應制

廣宣 三首

天上萬年枝人間不可窺道場三教會心地百王期侍
講沾恩早傳香駐日遲在筵還向道通籍許言時空媿
倍仙列何階答聖慈從今精至理長願契無為

皇太子頒賜存問并索唱和新詩因有陳謝

望苑招賢後禪房訪道餘祇言俟文雅何意及庸虛率
性多非學緣情偶自書清風聞寺響白日見心初重道
逢軒后崇儒過魏儲青宮列芳梓玄圃積瓊琚鄭鼠寧
容者齊竿久舍諸空懷受恩感含思幾躊躇

降誕日內庭獻壽應制

慶壽千齡遠敷仁萬國通登霄欣有路捧日愧無功仙
駕三山上龍生二月中修齋長樂殿講道大明宮此地

人難到諸天事不同
法筵花散後空界滿香風

送姚明府赴招義縣

無可八首

濠梁古縣城結束赴王程
道路攜家去波濤隔月行車
臨芳草下吏踏落花迎暮郭
山遙在春洲鳥不驚風煙
譙國遠桑拓楚田平何以書
能化長淮澈海清

送杜司馬遊蜀中

為客應非願愁成欲別時
還遊蜀國去不惜杜陵期劍
水啼猿在關林轉棧遲日光
低峽口雨勢出峨眉山迴

逢一作遲殘角雲開識遠夷勿令雙鬢髮併向錦城衰

和賓客相國詠雪詩

近臘千巖白迎春四氣催雲陰連海起風急度山來盡
日隨堤絮經冬越嶺梅豔疑歌處散輕似舞時迴道蘊
詩傳麗相如賦騁才霽添松篠媚寒積蕙蘭猜暗漲宮
池水平封輦路埃燭龍初照曜巢鶴乍徘徊簷日瓊先
挂墻風粉旋摧五門環玉壘雙闕對瑤臺綺席陵寒坐
珠簾達曙開靈芝霜下秀仙桂月中栽卷幌書千帙援

琴酒百盃垂休編太史呈瑞表中台皓夜迷三徑浮光
徹九垓茲辰是豐歲歌詠屬良哉

寄題廬山二林寺

廬嶽東南秀香花惠遠蹤名齊松嶺峻氣比沃州濃積
岫連何處幽崖越幾重雙流湓隱隱九派棹憧憧山限
東西寺林交旦暮鐘半天傾瀑溜數郡見鑪峯巖並金
繩道潭分玉像容江微匡裕路日杲晉朝松檟徑新苞
折梅離故葉壅嵐光生疊砌霞燄發高墉窓籟虛聞狖

庭煙黑過龍定僧仙嶠起逋客虎溪逢
落垂楊戶荒涼種杏封塔留紅舍利池
吐白芙蓉畫壁披雲見禪衣對鶴縫
喧經泉滴漚沒履草丰茸翠竇欹攀
乳苔橋側杖筇探奇盈夢想搜峭滌
心胸冥與終難盡登臨惜未從上方
薇蕨滿歸去養乖慵

寄羽林盧大夫將軍

將軍直禁闈繡服曜金羈羽衛九天
靜英豪四塞知望雲回朔鴈隔水射
宮麋舊國無歸思秋堂夢戰時門風

荀氏敵劍藝霍家推計日旌旄下蕭蕭萬馬隨

送李使君赴瓊州兼五州招討使

分竹雄兼使南方到海行臨門雙旆引隔嶺五州迎
鵲同枝宿蘭蕉夾道生雲垂前騎失山豁去帆輕雨露
蒸秋岸波濤震夜城政閒開迥閣欹枕島風清

贈王將軍

勲高絕少年分衛玉階前雄勇明王重溫恭執友賢功
書唐史滿名到虜庭偏劍彩浮龍影衣香襲御煙搜書

秋霽閣走馬夕陽田急免投深草
瞋鷹下半天野人迎
邸第朝客醉盤筵位在將軍列
官隨憲府遷刻心思報
國吁氣欲開邊選帥如公議
須知少比肩

送韓校書赴江西

車馬東門別揚帆過楚津
花繁期到幕雪在已離秦
吟落江沙月行飛驛騎
塵猿聲孤島雨草色五湖春
折葦鳴風岸遙煙起暮蘋
鄱江連郡府高興寄何人

送戴三徵君還谷口舊居

理瑩

巖穴多遺秀，弓車屢遠招。
周王尊渭叟，穎客傲唐堯。
出處天波合，關河地勢遥。
瞻星吳郡夜，作霧華山朝。
清論虛重席，閒居挂一瓢。
漁歌思坐酌，宸渥寵行輶。
春為荷裳暖，霜因葛屨消。
層崖懸瀑溜，萬壑振清飈。
谷鳥猶遷木，場駒正食苗。
謝安何日起，台鼎佇君調。

夜直

子蘭

大內隔重牆，多聞樂未央。
燈明宮樹色，茶煮禁泉香。
鳳輦通門靜，雞聲入漏長。
宴榮陪御席，話密近龍章。
吟步

彤墀月眠分玉署涼欲粘朱紱重頻草白麻忙筆力將
羣吏人情在致唐萬方瞻仰處晨夕面吾皇

雪

可止

落處成過尺倏然物象淒瑞凝金殿上寒甚玉闕西潤
比江河普明將日月齊凌雲花頂膩鎖徑竹梢低出谷
樵童怯歸林野鳥迷煮茶融破練磨墨染成鷺陷兔埋
平澤和魚凍洽溪入樓消酒力當檻寫詩題道路依憑
馬朝昏委託難洞深猿作簇松亞鶴移棲及夏清巖穴

經春溜石梯豐年兼泰國天道育黔黎

七言排律

月夜有懷王端公兼簡朱孫二判官

清江

月照疎林驚鵲飛
羈人此夜共無依
青門旅寓身空老
白首頭陀力漸微
屢向曲池陪逸少
幾迴戎幙接玄暉
四科弟子稱文學
五馬諸侯是繡衣
江鴈往來曾不定
野雲搖曳本無機
修行未盡身將盡
欲向東山掩舊扉

唐
五言絕句附

山居

寒山子
三首

吾心似秋月
碧潭清皎潔
無物堪比倫
教我如何說

其二

碧澗泉水清
寒山月華白
默知神自明
觀空境逾寂

其三

閒遊華頂上
天朗月光輝
四顧晴空裏
白雲同鶴飛

送朱放

靈一

苦見人間世思歸洞裏天縱令山鳥語不廢野人眠

月夜泛舟

法振

西塞長雲盡南湖片月斜漾舟人不見卧

一作悞

入武陵

花

待山月

皎然 七首

夜夜憶故人長教山月待今宵故人至山月知何在

湖南蘭若

未到無為岸空憐不繫舟東山白雲意歲晚尚悠悠

法華寺望高峯贈如獻上人

峯色秋天見松聲靜夜聞影孤長不在行道入深雲

答李季蘭

天女來相識將花欲染衣禪心竟不起還捧舊花歸

酬李紆補闕

不住東山寺雲泉處處行近臣那得識禪客本無名

界石守風望天竺靈隱

山頂東西寺江中旦暮潮歸心不可到松路在青霄

贈柳喜自號嵩山老

一見嵩山老吾生恨太遲問君年幾許曾出上皇時

遠公墓

靈徹
二首

古墓石稜稜寒雲晚景凝空悲虎溪月不見鴈門僧

天台山華頂峯

天台衆峯外華頂當寒空有時半不見崔嵬在雲中

尋隱者不遇

無本
二首

松下問童子言師採藥去只在此山中雲深不知處

寄友

聞說到揚州吹簫有舊遊人來多不見莫是上迷樓

城上吟

子蘭 三首

古塚密於草新墳侵古道城外無閒地城中人又老

襄陽曲

為憶南遊人移家大堤住千帆萬帆來過盡門前去

戒貪

多求待心足未足旋傾覆明知貪者心求榮不求辱

懷故園

脩睦

故園歸未得此日意何傷
獨坐水邊草水流春日長

寒江上望

貫休

四首

荒岸燒未死白雲凝不動
極目無人行浪打取魚籠

月夕

霜月夜徘徊樓中羌笛催曉

一作晚

風吹不盡江上落殘

梅

楊用修評此詩有樂府聲調亦猶惠休之碧雲也

偶作

夜雨山草濕爽籟禱枯木閒吟竺仙偈清絕過於玉

早霜寄蔡大

昨夜楚鐘鳴飛霜下楚城定知遷客鬢先向鑑中生

撲滿子

齊已

祇愛滿我腹爭知滿害身到頭須撲破卻散與他人

逢老人

隱巖

路逢一老翁兩鬢白如雪一里二里行四迴五迴歇

賦洞庭

可朋

周極八百里凝眸望則勞水涵天影闊山拔地形高

栽松

師虔

長長三尺餘鬱鬱覆青草不知何代人得見此松老

錢武肅王召賦辭

無作

雲鶴性孤單爭堪名利關銜恩雖入國辭病却歸山

六言

秋日思舊山

子蘭

咸言上國繁華豈得帝城羈旅十點五點殘螢千聲萬

聲秋雨白雲江上故鄉月下風前吟處欲去不去遲遲
未展平生所佇

春野作

貫休

閒步淺青平綠流水征車自速誰家挾彈少年擬打紅
衣啄木

古今禪藻集卷六

欽定四庫全書

古今禪藻集卷七

明釋正勉釋性通同輯

唐
七言絕句

赴召

辯才

雲霄咫尺別松關
禪室空留碧嶂間
縱使朝廷卿相貴
爭如心與白雲閒

偶題

寒山子

胭脂畫面嬌千樣龍麝薰衣俏百般今日風流都不見
綠楊芳草觸饑寒

題王僧院

靈一 六首

虎溪閒月引相過帶雪松枝挂薜蘿無限青山行欲盡
白雲深處老僧多

宿靜林寺

山寺門前多古松溪行欲到已聞鐘中宵引領尋高頂
月照雲峯凡幾重

雨後欲尋天目山問元駱二公溪路

昨夜雲生天目東春山一雨幾回風
林花併逐溪流下
欲上龍池路不通

歸岑山過惟審上人別業

禪客無心憶薜蘿自然行徑向山多
知君欲問人間事
始與浮雲共一過

贈靈徹禪師

禪師來往翠微間萬里千峯到剡山
何時共到天台裏

身與浮雲處處閒

與元居士濯纓潭飲茶

埜人煙火白雲間
坐飲香茶愛此山
巖下維舟不忍去
清溪流水暮潺潺

臨川道中

護國 二首

出谷入谷路迴轉
秋風已到歸期晚
舉頭何處望來蹤
萬仞千山鳥飛遠

贈張駙馬珽竹拄杖

此君與我在雲谿勁節竒文勝杖藜為有歲寒堪贈遠
玉階行處願提攜

山居

懷素 二首

祝融高坐對寒峯雲水昭丘一萬重五月衲衣猶近火
起來白室冷青松

自嘲

人人送酒不曾沽終日松間挂一壺草聖欲成狂便發
真堪畫作醉僧圖

畫松

景雲

畫松一似真松樹且待尋思記得無曾在天台山上見
石橋南畔第三株

逢友人上都

法振

玉帛徵賢楚客稀猿啼相送武陵歸
潮頭望入桃花去
一片春帆帶雨飛

長門怨

皎然

二十首

春風日日閉長門
搖蕩春心似夢魂
若遣花開只笑一作

闕
妾不如桃李自無言

銅雀妓

強開罇酒向陵看憶得君王舊日歡
不覺餘歌悲自斷
非關豔曲轉聲難

塞下曲二首

寒塞無因見落梅羌人吹入笛聲來
勞勞亭上春應度
夜夜城南戰未回

都護今年去武威陰沙萬里鳥空飛
旌干瀚海掃雲出

羶騎天山踏雪歸

聽邊笳送人

一奏邊笳客未停
野僧還欲廢禪聽
難將此意臨江別
無限春風葭莢青

送僧遊宣城

楚山千里一僧行
念爾初緣道未成
莫向舒姑泉口泊
此時嗚咽易傷情

送履霜上人還金陵

攜錫西山步綠莎
禪心未了奈情何
湘宮水寺清秋夜
月落風悲松柏多

送聰上人還廣陵

莫學休公學遠公子
心還與我心同
隋家古柳數株在
看取人間萬事空

晚秋破山寺

秋風落葉滿空山
古殿殘燈石壁間
昔日經行人去盡
寒雲夜夜自飛還

舟行懷閻士和

二月湖南春草徧橫山渡口花如霰相思一夜在孤舟
空見歸雲三兩片

寄題雲門寺梵僧無側房

時人傳是
寶月後身

越山千萬雲門絕西僧貌古還名月清朝掃石行道歸
林下眠禪看松雪

法華寺上方題江上禪室

路入松聲遠更奇山光水色共參差中峯禪寂一僧在

坐對梁朝老桂枝

題秦系山人麗句亭

獨將詩教領諸生，但愛青山不愛名。
滿院竹聲堪愈疾，亂床花片足忘情。

送顧道士遊洞庭

見說洞庭無上路，春遊亂踏五靈芝。
含桃風起花狼籍，正是仙翁棋散時。

送邢台州濟

海上仙山屬使君
石橋琪樹古來聞
他時畫出白團扇
乞取天台一片雲

楊用修丹鉛錄云晉人重扇題畫謂之便面
又曰方麴如羊孚雪贊右軍蒲葵是其事也

冬日梅溪送裴方舟之宣州

平明匹馬上村橋
花發梅溪雪未消
日短天寒愁送客
楚山無限路遙遙

送僧之京師

綿綿渺渺楚雲繁
萬里西歸望國門
禪子初心易悽斷

秋風莫上少陵原

題湖上草堂

山居不買剡中山湖上千峯處處閒芳草白雲留我住
世人何事得相關

昭君怨

自倚嬋娟望主恩誰知美惡忽相翻黃金不買漢宮貌
青塚空埋胡地塵

贈張道士

玉京真子名太一因服日華心如日此心不許世人知
只向仙宮不曾出

酬祁判官湖上見贈

歲歲湖南隱已成如何星使忽知名沙鷗慣逐無心客
今日逢君不解驚

送韋向之睦州謁使君

才子南看多遠情閒身蕩漾任春行新安江色長如此
何似新安太守清

送婆羅門生

清江 三首

雪嶺金河獨向東
吳山楚澤意無窮
如今白首鄉心盡
萬里歸程在夢中

小雪

花雪隨風不厭看
更多還肯失
類詩作蔽林巒愁人正在書

窓下一片飛來一片寒

精舍遇雨

空門寂寂澹吾身
溪雨微微洗客塵
卧向白雲情未盡

任他黃鳥醉芳春

東林寺作酬韋丹刺史

靈徹四首

年老心閒無外事
麻衣草座亦容身
相逢盡道休官去
林下何曾見一人

元日觀郭將軍早朝

欲曙九衢人更多
千條銀燭照星河
今朝始見金吾貴
車馬縱橫避玉珂

西林寄楊公

日日愛山歸已遲閒閒空度少年時
余身定寄林中老
心與長松片石期

簡寂觀

古松古柏巖壁間
猿攀鶴巢古枝折
五月有霜六月寒
時見山翁來取雪

答鹽官齊安國師見招

法常
二首

摧殘枯木倚寒林
幾度逢春不變心
樵客遇之猶不顧
郢人何事苦相尋

一池荷葉衣無盡數樹松花食有餘剛被世人知住處
又移茅舍入深居

寺中賞花應制

廣宣

東風萬里送香來上界千花向日開却笑霞樓紫芝侶
桃源深洞訪仙才

馬嵬

無本二首

長川幾處樹青青孤驛危樓對翠屏一自武皇惆悵後
至今來往馬蹄腥

行次漢上

習家池沼草萋萋
嵐樹光中信馬蹄
漢主廟前湘水碧
一聲風角夕陽低

御溝水

無可

鑿禁疏雲數道開
東風岸柳拂青苔
銀波玉沫空池去
曾歷千巖萬壑來

送宗禪師

清塞

四首

衡陽一別十三春
行脚同來有幾人
老大却思歸嶽寺

當時未漆祖師身

送蜀僧

萬里獨行無弟子
惟齋筇竹與檀龕
看經更向吳中老
應是山川似劍南

過僧竹院

一生愛竹自未有
每到此房歸不能
高人留宿話禪後
寂寞兩堂空夜燈

送僧

草履初登南客船
銅瓶猶貯北山泉
衡陽舊寺秋歸後
門鎖寒潭幾樹蟬

長安早秋

子蘭
五首

風舞槐花落御溝
終南山色入城秋
門門走馬徵兵急
公子笙歌醉玉樓

登樓

邊色鴻聲一例秋
大波平日遶山流
故人千里同明月
盡夕無言空倚樓

蟬

獨蟬初唱古槐枝
委曲悲涼斷續遲
雨後忽聞誰最苦
異鄉孤館憶家時

太平里尋兵部裴郎中

不語淒涼無限情
荒階行盡又重行
昔年住此人何在
空見槐花秋草生

晚景

池荷衰颯菊芬芳
策杖吟詩上草堂
留目暮雲風卷盡

郡樓寒角數聲長

暮春送友

無悶 二首

折柳亭邊手重攜
江煙淡淡草萋萋
杜鵑不顧離人意
更向落花枝上啼

寒林石屏

草堂無物伴身閒
唯有屏風枕簟間
本向他山求得石
却於石上看他山

答盧善

良乂

風泉祇向夢中聞
身外無餘可寄君
當戶一輪惟曉月
挂簷數片是秋雲

寒食

雲表

寒食悲看郭外春
野田無處不傷神
平原壘壘添新塚
半是去年來哭人

船居寓意

德誠

千尺絲綸直下垂
一波纔動萬波隨
夜靜水寒魚不食
滿船空載月明歸

寄南山景禪師

棲白 三首

一度林前見遠公，靜聞真語世情空。
至今寂寞禪心在，任起桃花柳絮風。

月夜懷劉秀才

獨夜相思但自勞，阮生吟罷夢雲濤。
此時小定未禪寂，古塔月中松磬高。

哭劉得仁

為愛詩名吟到死，風魂雪魄去難招。
直須桂子落墳上，

生得一枝冤始銷

書石壁禪居

貫休
六首

赤旃檀塔六七級白菡萏花三四枝
禪客相逢祇彈指
此心能有幾人知

聽僧彈琴

家近吳王古戰城海風終日打檣聲
今朝鄉思渾堆積
琴上聞師大蟹行

古戰場

鬼氣蒼黃棘葉紅昔時人血此時風可憐極目無疆地
曾落將軍一陣中

初秋

葦風荷露逼人寒午夢天高眼界寬落落與誰同此意
纖纖初月上雲端

閱衡嶽楚雲上人血書法華經

剔皮刺血誠何苦為寫靈山九會文十指漉乾終七軸
後來求法更無君

林間錄云唐僧楚雲血書蓮經祕於福嚴三生藏隨日若開此經誓同慈

氏宋皇祐間有貴人遊山見之疑其妄使人以
鉗發之有血如綫出焉須臾風雷震山谷煙雲
四障彌日不散貴人投誠懺
悔嗟乎願力所持乃爾異也

少年行

錦衣鮮華手擎鵲間行氣貌多輕忽稼穡艱難總不知
三皇五帝是何物

織婦

處默

蓬鬢蓬門積恨多夜闌燈下不停梭成繅猶自陪錢納
未直青樓一曲歌

貽九華上人

齊己
五首

一法傳聞繼老能
九華閒卧最高層
秋鐘盡後殘陽暝
門掩松邊雨後燈

謝猿皮

貴向獵師家買得
攜來乞與坐禪床
不知摘月秋潭畔
曾對何人啼斷腸

放鸚鵡

隴西花嶽結巢高
本為無人識翠毛
今日籠中強言語

乞歸天外啄金桃

觀荷葉露珠

霏微曉露成珠顆宛轉田田未有風
任器方圓性終在不妨翻覆落池中

偶作寄王祕書

七絲湘水秋深夜五字河邊日暮時
借問祕書郎此意靜彈高詠有誰知

宿李主簿林亭

清塞

獨樹幽亭新月入城牆
四面鎖山多去年今夜還來此
空見西風裊燕窠

秋夜吟

尚顏

梧桐雨畔夜愁吟
抖擻衣裾蘚色侵
枉道一生無繫著
湘南山水別人尋

山居

法珍
四首

煙暖喬林啼鳥遠
日高方丈落花深
積香厨內新茶熟
輕汎松花滿盃金

風定泉聲當澗響雨餘山色入樓多老僧滅却心頭火
一榻松陰養太和

清風拂處葉欲落碧蘚堆時人不來滿院秋光濃欲滴
禪門閒向白雲開

梅花牆角開新厯松樹枝頭曝衲衣怕冷老僧嫌朔吹
却教童子掩柴扉

琴

隱巒

七條絲上寄深意澗水松風生十指自乃知音猶尚稀

欲教更入何人耳

桐花鳥

可朋

五色毛衣比鳳雛
深花叢裏祇如無
美人買得偏憐惜
移向金釵重幾銖

伍相廟

常雅

蒼蒼古廟映林巒
冪冪煙霞覆石壇
精魄不知何處在
威風猶入浙江寒

題羅霄洞

德最

江南二月春無邊
谿行十里花爭妍
兒童且莫吹羌笛
我欲臨流枕石眠

對御書後一絕

亞棲二首

通神筆法得玄門
親入長安謁至尊
莫怪出來多意氣
草書曾悅聖明君

贈英禪師

將知德行異尋常
每見持經入道場
欲識用心精潔處
一瓶秋水一爐香

端午感言

文秀

節分端午自誰言萬古傳聞為屈原堪笑楚江空渺渺
不能洗得直臣冤

百舌

無側


千愁萬恨過花時似向春風怨別離若使衆禽俱解語
一生懷抱有誰知

古梅

無名釋

雪虐風饕水浸根石邊尚有古苔痕天公未肯隨寒主

又孽清香與返魂



古今禪藻集卷七